COPIE

D'UNG MÉMOIRE TOUCHANT NAMUR ET LORRAINE, ESCRIPT DE LA MAIN DE MONSIEUR LE CHANCELIER L'HOSPITAL.

Namur a deux rivières, la Meuse et Sambre, qui est Sabris, en latin, et les rassemble. Sabris perd son nom. L'on trouve auprès de Namur force marbre noir.

Ont esté ci-devant grandes guerres, à cause du comté, entre les princes de Flandres, de Luxembourg et de Lorraine; parce que voulant le comte Henry de Namur, qui mourut sans hoirs, quitter ledict comté, ou à Bauldoin son cousin, comte de Hainault, père de Bauldoin, comte de Flandres, qui, depuis, fut empereur de Constantinople, à qui debvoit venir par succession ledict comté de Namur, parce que ledict Bauldoin, comte de Haynault, estoit filz d'une sœur germaine dudict Henry, nommée Adèle; ou le donner à Valeran, comte de Luxembourg, qui estoit filz de son aultre sœur, plus jeune, qui avoit nom Ysabeau, vinrent à la bataille, et eut la victoire ledict comte Bauldoin, et feut prins le comte Valeran, avecque beaucoup d'aultres seigneurs de sa compaignie : lequel Valeran, pour issir (sortir) de prison, délaissa audict Bauldoin ledict comté de Namur.

*Depuis, la royne Blanche, mère du roy sainct Loys, achepta ledict comté de Namur, de Bauldoin II, empereur de Constantinople; lequel ycelle royne bailla en douaire à Marie, impératrice de Grèce, fille de Jehan de Briene, roy de Hiérusalem, et femme dudict Bauldoin II, empereur.

Si le prins par force Henry, comte de Luxembourg, ayeul de l'empereur Henry VII, depuis, le comte Henry de Luxembourg bailla sa fille Ysabeau en mariaige au comte de Flandres Guy d'Ampètre, et ledict comté de Namur pour dot. Ainsy vint en la maison de Flandres, tellement que tous les estats qui sont à présent en la maison de Bourgongne vinrent au duc Philippes, père de Charles, dernier duc.

CHAPITRE DE BOUBAT.

Lorraine, appelée de Lothaire, auquel feut donnée pour partaige par Loys, fils de Charlemaigne, et contenoit lors Brabant et le Liége. Depuis que la race de Charlemaigne feut finie en France, et que celle de Hugues Capet régna, y eut plusieurs guerres, à cause dudict duché de Lorraine; entre les empereurs d'Allemaigne et les roys de France.

Othon premier, empereur, desconfit son frère Henry, qui s'estoit rebellé, et Éberard frère et Conrard premier, empereur, ensemble; Gisilbert, duc de Lorraine, beau-frère dudict Othon, maria sa sœur Gebergue, vefve dudict Gisilbert, avecque Loys IV, roy de France, surnommé le trans-marin (1); et par là cessa la guerre à cause du duché de Lorraine.

Ledict Othon, bailla ledict duché de Lorraine au comte Othon, et depuis à Conrard, duc de Suève, ensemble sa fille pour femme; lequel Conrard n'en jouyt guères. Succéda audict duché Brunon, archevesque de Colonie (Cologne), frère dudict Othon, et le deffendit contre le comte Raynier et aultres tenant le party de France, comme parent du duc Gisilbert.

Depuis, Othon II, empereur, donna ledict duché à Charles, frère du roy Lothaire de France, lequel Charles, après la mort de son frère, et fils de son frère, se vouleut faire roy; mais feut prins et mené à Orléans, où mourut prisonnier, et son fils Othon après luy, et vint la couronne de France à Hugues Capet; mais Othon II donna ledict duché de Lorraine à Godefroy, fils de Go-

⁽¹⁾ Louis d'outre-mer.

defroy, comte des Ardennes; mais ledict duché estoit départy en plusieurs pièces, dont partie vint aux églises de Colonie, de Liége, de Nivèle, de Louvain et de Bruxelles, et Anvers feut marquisat du sainct empire.

Ledict duché, ou ce qui restoit, fut possédé par les comtes d'Ardennes, jusques à Godefroy de Bouillon, fils d'Eustache comte de Bologne, lequel Godefroy la print par succession de son oncle Godefroy, appelé le Bossu, fils de Gothelon, duc de Lorraine; et les empereurs donnèrent ledict duché aux descendans dudict duc Charles, qui estoient les comtes et ducs de Louvain, du costé des filles.

Finablement, l'empereur Henry V le rendit à Geoffroy, appelé le Barbeu, duc de Louvain, en l'ostant à Henry, duc de Lembourg, qui le tenoit par don de Henry le quart; et feut teneu longuement par les héritiers dudict Geoffroy-le-Barbeu. Lequel Barbeu recouvra, par force d'armes, des comtes d'Ardennes ce qu'ilz tenoient occupé de Brabant, et accomplit ce qu'il avoit promis à son père, le comte de Louvain, qu'il ne couperoit sa barbe jusqu'à ce qu'il eust recouvert ledict duché, qui lui appartenoit comme dépendant de la lignée dudict duc Carle.

Peu de temps après, ledict duché feut divisé en deux, Brabant et Lorraine, desquels l'empereur Charles V tient une partie, et pour ce, s'appelle duc de Lothreich, à cause de Brabant du Lembourg; et la Lorraine ou supérieure, tiennent en nostre temps ceulx qui descendent de Frédéric, comte de Vaudemont, qui succéda audict duché, à cause de Yoland, sa femme, fille de René, roy de Sicile et duc de Lorraine.

Philippes-le-Bon succéda à l'estat de Brabant; ce feut luy qui institua l'ordre de la Toison.

Louvain est la principale ville de Brabant, et où leurs princes font premièrement le serment. L'université de Louvain feut fondée par le duc Jehan de Brabant, et le privilége baillé par le pape Martin V, en 1426.

Bruxelles tient le second lieu du duché de Brabant; en elle est la chastellenie, les conseillers de justice et présidens, les auditeurs de la chambre du duché de Brabant. La rivière qui y passe s'appelle Zenia.